

襄陵文集

襄陵文集

四庫全書珍本初集

集部
別集類

詳校官庶吉士臣陳若霖

侍讀臣孫球覆勘

商務印書館受教育
部中央圖書館籌備
處委託景印數字庫
物院所藏文牘開本

欽定四庫全書

集部三

提要

襄陵文集十二卷

別集類二 宋

臣等謹案襄陵文集十二卷宋許翰撰翰字
崧老拱州襄邑人元祐三年進士徽宗欽宗
時再為給事中擢同知樞密院以議論不合
去高宗即位召為尚書右丞兼權門下侍郎
復乞宮祠以歸事迹具宋史本傳據蔡條鐵

圍山叢談所載條與翰蓋最相契然史稱翰于宣和間即奏記蔡京謂百姓困弊起為盜賊天下有危亡之憂願罷雲中之師修邊保境時不能用其後燕山之役卒以召釁論者謂其有曲突徙薪之謀其諫种師道不當罷疏至三四上亦深得救時要領至南渡後入踐政府極論黃潛善姦邪而力言李綱忠義可用致為宵小齟齬去位生平正直之節終

始不撓今所上章奏具在集中其勁氣凜然
猶可想見然則條所記錄亦為其西清詩話
依附蘇黃以求名耳不足為翰累也翰所著
有論語解春秋傳諸書蓋頗究心於經術深
故發為文章具有源本惟論配享劄子一通
稱揚雄與孟子異世同功請以配食孔子廟
廷位次孟子其說頗為誣謬耳陳振孫書錄
解題稱襄陵集二十四卷其本久佚今據永

樂大典所載採輯編次釐為十二卷其奏疏
為永樂大典所原缺者則別據歷代名臣奏
議補入庶直言讜論猶得以考見其什一云
乾隆四十六年九月恭校上

總纂官

臣紀昀

臣陸錫熊

臣孫士毅

總校官

臣陸

費

墀

膳錄監生 臣任 溥

膳錄監生 臣黃 鐘

膳錄副貢生 臣杭 光 晉

欽定四庫全書

襄陵文集卷一

宋 許翰 撰

制

蔡卞除待制制

為點對玉
嬰神變經

朕祇若天命開明道機嘉與羣生共蒙休祉制為真簡
備著靈文歷選時才是正謬誤逮觀奏御咸極精深某
官生於名家席其素業文學之譽聲動膠庠辨治之能
風生郡縣比自合宮之貳陞聯祕殿之華成書既刊賞

渥宜懋遂參法從是謂異恩益勵猷為往膺寵獎

虔州坑壩火齊之才可承信郎制

為自備才力
不借官本費

到淨利依
格補官

勅某地有珍產爾能發之以佐國用在法當錄勉爾力
以聽官使可

邵護為父陣亡可承信郎制

士有伏節死事不得身受典賞則子獲承之所以明恩
而起信也俾秩以官用勸忠順往服恩榮圖所以報可

金重寶等授承信郎制

邊吏無良羌戎弗率靖夏失守覆我嘉師朕心憫焉不
忘震悼深詔執事厚錄其孤俾秩以官用慰伏節惟忠
惟孝往服恩榮勿忝前修祇若予訓

節度使郭仲妻姪陳乞補承信郎制

朕於殿巖之臣加厚其老而勤恤其亡猶以為未也至
其族姻多俾甄錄而爾蒙澤焉往飭其躬以聽官使可

蕃官男為父陣亡補承信郎制

勅某等朕以仁覆天下欲息兵甚間者夏賊擾邊師不得息至使豪俊制壽於鋒鏑忠義伏節於原野非朕志也故深詔執事錄死事者之子孫厚厥寵秩稱朕所以哀矜之意可

周江呈試武藝補承信郎制

有司以爾武力聞朕臨觀便殿挽強蹶勁可官而使往祇寵命圖所以報可

策伊克阿授承信郎制

邊吏言爾去戎即華忠効純白有力於軍旌爾以官往
其圖報

綽爾授承信郎制

爾能勤事伏節精白著明而弗獲受賞朕甚矜之秩爾
以官用勸忠順

待詔沈明補承信郎制

爾服勤禁苑積有功緒寵以官使往虔勿懈可

林致和修造所有勞並補承信郎制

勅爾等祇服禁嚴有勞可錄膺茲寵秩往懋事功可

黃宴寶可承節郎制

爾能深入谿洞斬馘醜虜陷銳不顧傷夷可矜秩以官
榮勵厥忠勇

蕃官莫廷豐納土補承節郎制

盛時普覆遠人咸賓谿洞阻深籍土來請嘉爾首奮忠
孝精白被以恩華往為榮耀

太學生充大晟府製撰葛底幾補迪功郎制

爾以太學諸生業文游藝隸職樂府詞采可觀既閱歲
時當蒙差錄登于初秩往勵修能可

郭蔓之等並可閣門宣贊舍人制

爾父為國虎臣茂建帥節出捍邊圉入護殿嚴蔚有勞
能宜蒙壽祉奄云淪謝朕甚悼焉俾錄諸孤用示勤恤
或增爾秩或躋爾職咸膺異數往紹遺衷可

胡忭轉遥郡刺史制

比命元樞宣威西夏分遣官吏充備使令逮此罷司咸

蒙序績爾釋軒墀贊相之職而膺郡符刺舉之榮是謂
異恩毋忘報効

耿自求鹽課轉官制

有司言爾能督縣吏勸耕鹵壤抑末業之民使著於本
不惟蹇利是通懋進厥官用醕祗敏

王履轉官制

轉行
朝議

非法則天下之分不定非德則天下之志不通朕執成
憲以御多方而時因人心有所施予所以示德也爾子